



BARAZA LA WAWAKILISHI – ZANZIBAR

ORODHA WA SHUGHULI ZA LEO

BARAZA LA KUMI LA WAWAKILISHI

MKUTANO WA PILI

Kikao cha Tisa – Tarehe 24 Februari, 2021.

Kikao Kitaanza Saa 3.00 (Tatu) Asubuhi
na Dua zitasomwa.

I. TAARIFA YA SPIKA:

II. HATI ZA KUWASILISHA MEZANI:

Mwanasheria Mkuu wa Zanzibar:

Hotuba ya Uwasilishaji wa Mswada wa Sheria ya Kurekebisha Sheria Mbali Mbali na Kuweka Masharti Bora Ndani yake.

Mwenyekiti wa Kamati ya Kusimamia Ofisi za Viongozi Wakuu wa Kitaifa:

Hotuba ya Maoni ya Kamati ya Kusimamia Ofisi za Viongozi Wakuu wa Kitaifa kuhusu Mswada wa Sheria ya Kurekebisha Sheria Mbali Mbali na Kuweka Masharti Bora Ndani yake.

III. MASWALI:

Afisi ya Rais, Tawala za Mikoa, Serikali za Mitaa na Idara Maalum za SMZ:

76. MHESHIMIWA BAKARI HAMAD BAKARI (Jimbo la Wawi) - Atamuuliza Mheshimiwa Waziri wa Nchi, Afisi ya Rais, Tawala za Mikoa, Serikali za Mitaa na Idara Maalum za SMZ:

Barabara ya Wawi Mabaoni kupitia Skuli ya Dkt. Omar ni ya muda mrefu na ina historia kubwa sana katika nchi yetu. Barabara hii ni mbovu na inaleta usumbufu mkubwa sana kwa wananchi wanaoishi katika maeneo hayo.

- (a) Je, Serikali ina mpango gani wa kuikarabati barabara ya Mabaoni angalau kwa kiwango cha kifusi.
- (b) Je, Serikali inachukua hatua gani katika kuondosha changamoto hii kwa barabara za ndani zilizopo katika jimbo la Wawi.

91. MHESHIMIWA BIHINDI HAMAD KHAMIS (Nafasi za Wanawake) - Atamuuliza Mheshimiwa Waziri wa Nchi, Afisi ya Rais, Tawala za Mikoa, Serikali za Mitaa na Idara Maalum za SMZ:

Ili wanafunzi wapate elimu na kujenga ufaulu mzuri ni lazima hatua za maandalizi na msingi zipatiwe msukumo wa pekee ikiwemo usalama wa majengo. Skuli ya msingi ya Shumba Mjini na Maziwang'ombe zinavuja kupita kiasi.

Je, ni hatua gani Serikali itachukua kunusuru hali hiyo kabla ya msimu wa mvua kuchanganya.

Wizara ya Elimu na Mafunzo ya Amali:

28. MHESHIMIWA SALMA MUSSA BILAL (Nafasi za Wanawake)-
Atamuuliza Mheshimiwa Waziri wa Elimu na Mafunzo ya Amali:

Kumekuwa na ucheleweshaji wa kupatikana vyeti vya kumaliza masomo vya kidato cha Nne na Sita kwa wanafunzi baada ya kumaliza mitihani yao, jambo ambalo linawaitea usumbufu pale wanapotaka ama kuendelea na masomo au kuomba kazi kwa kutakiwa kupeleka cheti halisi na sio “result slip”.

Je, Wizara kwa kushirikiana na NECTA, ina mpango gani wa kuhakikisha vyeti hivyo vinapatikana kwa wakati ili kuwapunguzia usumbufu vijana wetu wanapomaliza masomo.

36. MHESHIMIWA HASSAN HAMAD OMAR (Jimbo la Kojani) -
Atamuuliza Mheshimiwa Waziri wa Elimu na Mafunzo ya Amali.

Ni haki ya mfanyakazi kupata mapumziko/ likizo kila mwaka mara moja au baada ya zaidi ya mwaka na anastahiki pia kupata posho la kujikimu wakati akiwa mapumziko.

(a) Kwanini Wizara imekuwa na usumbufu wa kutoa posho kwa wakati huku ikijua kwamba posho ni haki ya wafanyakazi.

(b) Je, utawasaidiaje wafanyakazi walionyimwa au kucheleweshwa kupewa posho zao wakiwa likizo.

88. MHESHIMIWA SHAMATA SHAAME KHAMIS (Jimbo la Micheweni) - Atamuuliza Mheshimiwa Waziri wa Elimu na Mafunzo ya Amali:

Licha ya Serikali kufanya juhudi kubwa ya kuendeleza ujenzi wa ukuta wa Chuo cha Kiislamu (CCK) Micheweni, bado kazi hiyo haijakamilika na huku kukiripotiwa vitendo ya uharibifu wa miundombinu ya majengo na mali za wanafunzi ikiwemo wizi.

(a) Je, ni sababu gani zinazopelekea kazi za ujenzi huo kutokamilika mpaka leo.

- (b) Je, tokea kuanza kwa ujenzi mpaka kufikia hatua ya ukuta, ni kiasi gani cha fedha kilichotumika na kiasi cha fedha kilichobakia cha ukamilishaji.
- (c) Je, ni muda gani Serikali ilikusudia kukamilisha ujenzi huo.

Wizara ya Maji, Nishati na Madini:

51. MHESHIMIWA HAJI SHAABAN WAZIRI (Jimbo la Uzini) -
Atamuuliza Mheshimiwa Waziri wa Maji, Nishati na Madini:

Mamlaka ya Maji Zanzibar imekuwa na utaratibu wa kuwaweka walenzi katika vibanda vya maji kwa ajili ya kuvilinda vibanda hivyo. Hata hivyo kwa kuwa kazi ya ulenzi ni ya kudumu lakini wanaofanya kazi hiyo wamewekwa sawa na wafanyakazi wa kujitolea na kuwapatia posho kwa ajili ya kazi hiyo.

Je, Mamlaka imeandaa mpango gani wa kuwaajiri walenzi hao ambao wameshafanya kazi kwa miaka mingi hadi sasa.

Wizara ya Ujenzi, Mawasiliano na Uchukuzi:

63. MHESHIMIWA HABIB ALI MOHAMED (Jimbo la Mtambwe) -
Atamuuliza Mheshimiwa Waziri wa Ujenzi, Mawasiliano na Uchukuzi

Naipongeza Wizara kwa kufanya kazi nyingi sana za ujenzi wa barabara.

- (a) Je, ni sababu gani zilizopelekea barabara ya Wete-Gando na Wete – Konde kupata athari kabla ya kufunguliwa rasmi.
- (b) Je, ni sababu zipi zilizopelekea watu waliostahiki kulipwa fidia kutokana na uharibifu wa nyumba zao uliotokana na ujenzi wa barabara hizo kutokulipwa stahiki zao.
- (c) Je, ni sababu gani zilizopelekea kushindikana kwa ujenzi wa barabara kongwe ya Wete- Chake kupitia Piki.

71. MHESHIMIWA BAKARI HAMAD BAKARI (Jimbo la Wawi) - Atamuuliza Mheshimiwa Waziri wa Ujenzi, Mawasiliano na Uchukuzi:

Mchakato wa ujenzi wa Uwanja wa Ndege - Pemba umefanyika miaka mingi iliyopita, ambapo katika mchakato huo wananchi ambao wameonekana kuingia katika eneo linalokusudiwa kuwa ni sehemu ya uwanja huo, walifanyiwa tathmini ya nyumba pamoja na vipando vyao.

- (a) Je, ni lini Uwanja huo unatarajiwa kujengwa.
- (b) Je, ni lini Serikali itawalipa fidia wananchi waliokwisha kufanyiwa tathmini ambao wameonekana kuwa ni waathirika katika eneo hilo la kiwanja.
- (c) Je, Serikali inatarajia kuwalipa wananchi hao fidia kwa kuzingatia thamani ile ya awali au kwa kuzingatia thamani halisi ya fedha.

Wizara ya Afya, Ustawi wa Jamii, Wazee, Jinsia na Watoto:

5. MHESHIMIWA MWANTATU MBARAK KHAMIS (Viti Maalum) Atamuuliza Mheshimiwa Waziri wa Afya, Ustawi wa Jamii, Jinsia na Watoto:

Kwa kuwa kumekuwa na changamoto kubwa ya vitendo vya udhalilishaji katika maeneo mbali mbali ya Zanzibar. Na kwa kuwa Serikali imeshatumia fedha nyingi kwa ajili ya kupunguza au kuondoa suala hili bila ya mafanikio.

Tukiachia semina na makongamano ambayo yamefanyika mengi bila ya kupata mafanikio, ni mikakati gani madhubuti ya Wizara iliyoandaliwa ya kuhakikisha vitendo hivyo vinaondoka.

82. MHESHIMIWA AZZA JANUAR JOSEPH (Nafasi za Wanawake) - Atamuuliza Mheshimiwa Waziri wa Afya, Ustawi wa Jamii, Wazee, Jinsia na Watoto:

Serikali inastahili pongezi kwa kufanya jitihada kubwa ya kutokomeza malaria hapa Zanzibar kwa kutumia dawa ya kuuwa mbu wa malaria.

Je, kwa nini Serikali isiweke mpango wa kuendeleza mradi ule kwa kuwa ulikuwa unasaidia kuuwa wadudu wengine ambao ni

kero katika jamii kama mende, kunguni, chawa na hata inzi ambao husababisha maradhi ya mlipuko.

IV. HOJA ZA SERIKALI:

Mwanasheria Mkuu wa Zanzibar:

Mswada wa Sheria ya Kurekebisha Sheria Mbali Mbali na Kuweka Masharti Bora Ndani yake – Kusomwa kwa mara ya Kwanza ya Pili na Tatu.

Zanzibar,
24 Februari, 2021.

(Raya Issa Msellem)
KATIBU WA BARAZA.